

La Regenza grischuna na s'exprima betg davart il Parc Adula

DA MARTIN CABALZAR

■ **Cuntrari a la regenza tessinaisa na s'exprima la regenza grischuna betg uffizialmain davart il Parc Adula. Quai ha ditg cusseglier guvernativ Martin Jäger a chaschun da la Scuntrada meinsila da la regenza cun ils meds da massa.** Damai chi sa tractia tar la votaziun dal Parc Adula da votaziuns communalas na s'intervegna la regenza betg en la campagna d'elecziun. Quai haja er da far cun il respect da l'autonomia communalas che saja – cuntari al Tessin – fitg exprimida en il Grischun. Il Tessin saja organisà a moda pli centralistica e main federalistica sco il Grischun ed uschia haja era la regenza là consequentmain dapli cumpetenzas. Tenor cusseglier guvernativ *Martin Jäger* sajan chantun e confederaziun dentant s'engaschads cun contribuziuns finanzialas considerablas

en la fasa da preparaziun dal concept. Cun tge summa che quai è stà n'ha Jäger betg pudì tradir.

A la dumanda da La Quotidiana sche la regenza prioriseschia tar quest project la protecciun da natira e patria ni la promozion da l'economia en las vischnancas e regiuns pertutgadas ha il minister da l'ambient puntuà che tuttas duas finamiras sajan equivalentas.

Exploitaziun da las auas en Lumnezia
Enconuschentmain han quatter organizaziuns da l'ambient recurrì cunter la concessiun che la regenza grischuna ha dà per la tschiffada da tschintg auas entadim la Lumnezia. Uss han ellas survegnì parzialmain raschun a Losanna e la regenza grischuna sto examinar anc ina giada da nov la problematica da l'aua restanta. Sco quai ch'il minister d'energia *Mario Cavigelli* han dentant accentuà è

el satisfatg ch'il nov project vegnia giuditgà da nov separadamain e na pretendia betg ina nova concessiun per l'entir implont da Zervreila che cumpiglia las centralas da Zervreila, Stussavgia e Rothenbrunnen. Sulet la dumanda da l'aua restanta stoppia anc vegnir giuditgada da nov. En discussiun stattan en quest connex cunzunt la Caltgera en Lumnezia, las Inslas e la Prada Gronda a Glion. Quellas figureschan anc betg en l'inventari federal, ellas na dastgian dentant betg vegnir pigiuradas en lur dimensiun fin ina decisiun definitiva davart l'inventarisaziun, pretenda il Tribunal. Cavigelli di che la regenza saja sa fundada en sia concessiun sin il pareri dal l'uffizi chantunal da l'ambient che haja constatà che l'exploitaziun entadim la Lumnezia n'haja betg ina gronda influenza sin l'aua restanta.

Damai che las examinaziuns supplementaras pretendidas dal tribunal fede-

ral pretendian considerablas retschertgas supplementaras na saja betg da quintar cun la realisaziun da quest implont en il decurs dals proxims tschintg onns. Era las Ovras da Zervreila vegnian la finala a stuer far in quint da rentabilitad, usche ch'i saja per il mument incert sche quest project vegn insumma realisà ni betg.

Era il project da pumpadi Lago Bianco vegn mess ad acta per il mument

Era la realisaziun dal project per ina ovra idraulica da pumpadi al Lago Biaco saja per il mument mess ad acta. I dependia uss grondamain da la politica d'energia e dal clima da l'avegnir sche questa ovra vegnia insumma realisabla ni betg. Actualmain vegn la forza idraulica tenor Cavigelli anc concurrenzada memia fitg d'energia fossila da charvun e da l'energia nucleara. Quai possia dentant sa midar ils proxims onns a favur d'energias re-

generablas, è Cavigelli persvadi. Decisiv per la Svizra saja cunzunt era en tge direcziun che la politica d'energia europeica mondia ils proxims onns, damai ch'il martgà d'energia saja oz bler pli globals.

Diversa

Cussegliera guvernativa *Barbara Janom Steiner* po sincerar che la consultaziun tar la revisiun totala da la lescha da vischnanca saja fruntada sin ordvart grond interess. Betg main che 148 pusiziuns sajan vegnidas inoltradas. La tractaziun dal messadi en il cussegl grond saja prevedida per l'atun 2017.

Il cancellier chantunal *Claudio Riesen* deplorescha ch'il project «e-voting» na progredescha betg tenor las imaginaziuns dal chantun Grischun. Damai chi sa tractia dentant d'in project naziunal tutgi deplorablamain da spitgar tochen quest project saja madir.